

**KANTON SARAJEVO****SKUPŠTINA KANTONA SARAJEVO****NAROD I PRAVDA****Danijela Kristić, zastupnica****Ministarstvu za rad, socijalnu politiku, raseljena lica i izbjeglice Kantona Sarajevo****PREDMET: INICIJATIVA**

Pokrećem inicijativu prema Ministarstvu za rad, socijalnu politiku, raseljena lica i izbjeglice Kantona Sarajevo za formiranje specijalizovanih stručnih timova za rad na predmetima nasilja u porodici u okviru službi socijalne zaštite na području Kantona Sarajevo, kao i za kadrovsko jačanje centara za socijalni rad.

Naime, iz odgovora Kantonalnog centra za socijalni rad na moje zastupničko pitanje proizilazi da trenutno ne postoji mogućnost da se svakoj žrtvi nasilja u porodici dodijeli stručna osoba koja bi bila zadužena za kontinuirano praćenje slučaja, pružanje podrške, procjenu rizika i koordinaciju sa drugim institucijama sistema zaštite.

U odgovoru se navodi da službe socijalne zaštite već sada obavljaju značajan broj poslova vezanih za zaštitu žrtava nasilja, ali da zbog izraženog nedostatka stručnog kadra, posebno psihologa, socijalnih radnika i drugih stručnih saradnika, nije moguće osigurati kontinuiran i intenzivan individualni rad sa svakom žrtvom nasilja.

Posebno zabrinjava podatak da u pojedinim službama socijalne zaštite, koje pokrivaju veliki broj stanovnika, nije popunjen ni postojeći broj sistematizovanih radnih mjesta stručnog kadra, dok istovremeno novi Zakon o zaštiti od nasilja u porodici i nasilja nad ženama u Federaciji Bosne i Hercegovine pred centre za socijalni rad postavlja dodatne i veoma kompleksne obaveze.

Stoga iniciram da Ministarstvo hitno razmotri:

- formiranje specijalizovanih interdisciplinarnih timova za rad na predmetima nasilja u porodici;
- povećanje broja psihologa, socijalnih radnika, pedagoga i pravnika u službama socijalne zaštite;
- uspostavljanje modela prema kojem bi svaka žrtva nasilja u porodici imala imenovanu stručnu osobu za praćenje slučaja i koordinaciju podrške;
- izradu jedinstvenih procedura i standarda postupanja do donošenja odgovarajućih podzakonskih akata na nivou Federacije Bosne i Hercegovine.

Cilj ove inicijative je osigurati pravovremenu, kontinuiranu i efikasnu zaštitu žrtava nasilja u porodici, te unaprijediti kapacitete institucija koje imaju ključnu ulogu u njihovoj zaštiti.

Sarajevo 17.06.2026.godine

Zastupnica u Skupštini KS

Danijela Kristić